

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq Naalakkersuisut matumuuna saqqummiuppaat:

Imaatigut ajunaarnernik, isumannaallisaanermik misissuinerit pillugit inatsimmik Kalaallit Nunaannut atuutilersitsinissaq pillugu peqqussummik, Namminersorlutik Oqartussat akuersissuteqarnissaannik Inatsisartut aalajangiiffigisassaattut siunnersuut (Isumaginninnermut, Suliffeqarnermut, Ineqarnermut, Attaveqaasersuutitut, Isorliunerusunullu Naalakkersuisoq)

1. Tunngavilersuut

Den Maritime Havarikommissioni (Imarsiornermi Umiiarnerit pillugit Ataatsimiitsitaliaq) 2021-mi taamani Ineqarnermut, Attaveqaasersuutitut Naligiissitaanermullu Naalakkersuisoqarfiusumut saaffiginnissuteqarluni, imaatigut ajunaarnernik misissuinerit pillugit Danmarkimi, Kalaallit Nunaannilu malittarisassat assigiissaarneqassasut kissaatigaa.

Saaffiginnissut tunuliaqutaralugu taamani Ineqarnermut, Attaveqaasersuutitut, Aatsitassanut, Inatsisit atuutsinneqarnerannut, Naligiissitaanermullu Naalakkersuisup 2021-mi aggustip 10-ani akuersissutigaa, søfartsstyrelsi suleqatigalugu inatsimmut kunngip peqqussutissaanik suliaq aallartinneqassasoq.

Ineqarnermut Attaveqaasersuutinullu Naalakkersuisup danskit inuussutissarsiornermut ministeriat 2024-mi qinnuigaa Danmarkimi, Kalaallit Nunaannilu malittarisassat assigiissaarneqarnissaannut suliaq aallarteqqullugu. *Imaatigut ajunaarnernik, isumannaallisaanermik misissuinerit pillugit inatsimmik Kalaallit Nunaannut atuutilersitsinissaq pillugu peqqussutissatut missingiut*, Naalakkersuisut Erhvervsministeriaqarfimmit maanna tigusimalerpaat.

Den Maritime Havarikommissioni maani nunatsinni imaatigut ajunaarnernik misissuigaangamik ajornartorsiuteqartaramik, imaatigut ajunaarnernik misissuineri Danmarkimi, Kalaallit Nunaannilu malittarisassat assigiissaarneqarnissaannik peqqussutissatut siunnersuut siunertaqarpoq.

2. Peqqussutissap imarisaa

Kalaallit Nunaanni imaatigut ajunaarnernik, isumannaallisaanermik misissuinerit pillugit inatsisissap atortuulersinneqarnissaatigut, Den Maritime Havarikommissionip maani nunatsinni sulinerata pitsaassussaa qaffassaaq.

Ataatsimiititaliap inatsisitigut tunngavissaqannginnini patsisigalugu, inuit akuusut tategaqatiginnermik neqeroorsinnaanagit misissuinerit ingerlattariaqartarsimavai. Misissuineq pillaatissiinissamik suliamik kinguneqassappat, inuit attuumassuteqartut pisinnaatitaaffiitut tamanna killiliivoq. Attuumassuteqartut nipangiussisussaataanerisa annertusineqarnissaanut

peqqussuteqarnikkut qulakkeerneqassaaq, ajunaarnernillu misissuinerit pillaatissap nalilerniarneqarsinnaaneranut immikkoortinneqassallutik. Taassuma saniatigut tatigeqatigiinnerup amigaatigineqarnera misissuinerit pitsaassusaannut aalajangiisuvoq, nunanilu allani havarikommissioninik suleqateqarniarneq ajornakusoortillugu.

Taassuma saniatigut havarikommissionip Kalaallit Nunaanni malittarisassat atoraangamikkit misissuinerimi periutsit nutaaliaasut, misissuinerup qaffasissumik pitsaassuseqarnissaanik qulakkeerisut atorsinnaaneq ajorpai.

Taassuma saniatigut Danmarkip, Kalaallit Nunaatalu imartaanni assigiimmik atugassaqartitsinissamik peqqussut pilersitsissaaq. Nunap imartaani imaatigut ajunaarnernik isumannaallisaanermik misissuinerit, nunat tamalaat akornanni malittarisassanut peqqussutitigut qaffanneqassapput.

Atortuulersitsinissaq:

Inatsisartut aalajangiiffigisassatut siunnersuut manna akuersissutigissappassuk, peqqussutip Kalaallit Nunaannut atortuulersinneqarnissaanut alloriaatissat Erhvervsministeriaqarfiup isumagissavai. *Imaatigut ajunaarnernik, isumannaallisaanermik misissuinerit pillugit inatsimmik Kalaallit Nunaannut atuutilersitsinissaq pillugu peqqussut-ip* akuersissutigineqarnerani 01.09.2026-mi atortuulersinneqassaaq. Taassumap tungaanut peqqussummut nalunaarutissatut missingiutit, ullormi inatsisip atortuulersinneqarnissaani aamma atortuulesinneqartussat suliarineqassapput.

Pisortanut aningaasatigut allaffissornikkullu kingunerisassai

Siunnersuut naalagaaffiup akisussaaffigimmagu pisortanut aningaasatigut, allaffissornikkullu kingunissaqanngilaq.

Namminersortunut aningaasatigut allaffissornikkullu kingunerisassai

Siunnersuut naalagaaffiup akisussaaffigimmagu namminersortunut aningaasatigut, allaffissornikkullu kingunissaqanngilaq.

Innuttaasunut aningaasatigut allaffissornikkullu kingunerisassai

Den Maritime Havarikommissionip Kalaallit Nunaanni sulineranut peqqussutissatut siunnersuut qaffaassaaq, innuttaasullu pisinnaatitaaffii annertusillugit. Ataatsimiititaliap suliaanik qaffaaneq, siunissami ungasinnerusumi imaani isumannaallisaanermut pitsannguisinnaavoq.

Tusarniaaneq

Imaatigut ajunaarnernik, isumannaallisaanermik misissuinerit pillugit inatsimmik Kalaallit Nunaannut atuutilersitsinissaq pillugu peqqussutissatut missingiut, Erhvervsministeriaqarfiup 2025-mi apriliip 10-anit, 2025-mi maajip 11-ata tungaanut tusarniutigaa.